

州將韓閏篤欽其道堅召出山育稱疾而已
 因是黑白之衆渴仰歸依韓使君輜車繼運
 供施交駢樹造法堂嚴飾奇麗時來問道韓
 侯問佛法已後事如何荅云如同太虛委在
 有力韓侯欽尚徒衆常有千計賢不肖駁雜
 而居住往聞有不測之僧預其聽受焉一旦
 說法次告衆曰善哉是會遭遇者艱須決所
 疑無遺虛度命水滌盥端坐而化春秋七十
 有三矣

唐兗州東嶽降魔藏師傳

釋藏師姓王氏趙郡人也父爲亳州掾稚齒
 尋師居然慕法而性好獨處譙多厲鬼持魅
 於人藏七歲隻影閑房孤形迥野嘗無少畏
 至年長彌見挺拔故號降魔藏歟請列青衿
 于廣福院明讚禪師師意其法器乃發擿之
 嘗對辯給荅出問表因留執事服勤受法伴
 誦法華踰月徹部登即剃落受具習律焉次
 講南宗論大機將發俄投塵尾九州靈跡罕

不登升後往遇北宗鼎盛便誓依棲秀問曰
 汝名降魔我此無山精木恠汝翻作魔邪曰
 有佛有魔秀云汝若是魔必住不思議境界
 也曰是佛亦空何不思議之有時衆莫不異
 而欽之先是秀師懸記之汝與少皞之墟有
 緣尋入泰山數年學者臻萃供億克周爲金
 輿谷朗公行化之亞也一日告門人曰吾今
 老朽物極有歸正是其時言訖而終春秋九
 十一矣

十八

大宋高僧傳卷第八



且八

大宋高僧傳卷第九

且九

左街天壽寺通慧大師賜紫 贊寧

左街相國寺講經論大德賜紫 智輪

同奉

勅撰

習禪篇第三之二 正傳十四人 附見四人

唐京兆慈恩寺義福傳一 行思

唐京師興唐寺普寂傳一

唐南嶽觀音臺懷讓傳三

唐京師大安國寺楞伽院靈著傳四 法旣

唐潤州幽棲寺玄素傳五

唐均州武當山慧忠傳六

唐太原甘泉寺志賢傳七

唐黃龍山惟忠傳八

唐南嶽石頭山希遷傳九

唐成都府淨衆寺神會傳十

唐杭州徑山法欽傳十一

唐壽春三峯山道樹傳十二

唐陝州迴鑿寺慧空傳十三 元觀

唐洛京龍興寺崇珪傳十四 全植

唐京兆慈恩寺義福傳 行思

釋義福姓姜氏潞州銅鞮人也幼慕空門忝累世務初止藍田化感寺處方丈之室凡二十餘年未嘗出房宇之外後隸京師慈恩寺

道望高峙傾動物心開元十一年從駕往東都經蒲號二州刺史及官吏士女皆齎楫花迎之所在途路充塞拜札紛紛瞻望無厭以二十年卒有制謚號曰大智禪師葬於伊闕之北送葬者數萬人中書侍郎嚴挺之躬行喪服若弟子焉又撰碑文神秀禪門之傑雖

有禪行得帝王重之無以加者而未嘗聚徒開法也洎乎普寂始於都城傳教二十餘載人皆仰之初福往東洛召其徒戒其終期兵部侍郎張均太尉房瑄禮部侍郎韋陟常所信重是日皆預造焉福乃升堂為門人演說且曰吾沒日吳當為此決別耳久之張謂房

曰某夙歲餽金丹未嘗臨喪言訖張遂潛去福忽謂房曰與張公遊有年矣張公將有非常之咎名節皆虧向來若終此法會足以免禍惜哉乃提房手曰必為中興名臣其勉之言訖而終後張均陷賊庭也受其偽官而房翼戴兩朝畢立大節皆終福之言矣又釋行

是九

二

思姓劉氏廬陵人也濡潤厥躬貞諒其性出塵之後納戒已還破觚求圓斷離為朴厥志天然也往韶陽見大鑿禪師一言蔽斷猶擊蒙焉既了本心地祇迭告還復吉州闡化四方禪客繁擁其堂開元二十八年十二月十三日入滅于本生地勅謚大師號曰洪濟塔曰歸真其塔會昌中例從堙毀後法嗣者重崇樹之

唐京師興唐寺普寂傳

釋普寂姓馮氏蒲州河東人也年纔稚弱率性軒昂離俗外壇循于經律臨文揣義迥異恒流初聞神秀在荊州玉泉寺寂乃往師事

凡六年神秀奇之盡以其道授焉父視中則天召神秀至東都論道因薦寂乃度為僧及秀之卒天下好釋氏者咸師事之中宗聞秀高年特下制令普寂代本師統其法衆開元二十三年勅普寂於都城居住時王公大人競來禮謁寂嚴重少言來者難見其和悅之

容遠近尤以此重之二十七年終于上都興唐寺年八十九時都城士庶謁者皆制第將之服有制賜謚曰大慧禪師及葬河南尹裴寬及其妻子並縗麻列于門徒之次傾城哭送閭里為之空焉裴尹之重寂職有由矣寂之闡化神異頗多裴皆目擊又得心印歸向

是元

三

越深時多譏誚裴日夕造謁執弟子禮曾無差脫一日詣寂寂懸知弟子一行之亡及寂之終滅裴之悲慟若喪所親縗經徒步出城妻子同爾搢紳之識生於是矣

系曰人之情也有愛惡焉愛之者不見可惡惡之者不見可愛矣夫萬物紛紛任其愛惡折中之道可愛而不可惡愛之者君子也惡之者小人也愛之不以道則君子之病矣裴尹冠裳在御職事在躬不避密行顯擬時諍宜哉譬諸僧耽俗務胡不捨袈裟而衣逢掖乎若實得道後終期脫屣有何不可邪寬不抽簪何悖禮於丘之門歟寬若行方外之道

復何誅焉達人觀物無不可矣

唐南嶽觀音臺懷讓傳

釋懷讓俗姓杜金州安康人也始年十歲雅好佛書炳然殊姿特有靈表識者占是出家相非染俗貴人寶來瑞國慶無疆方之麟鳳龜龍無萬數也天地無全功氣序有盈虛綱

維缺壤補塞不足皆冥維密祐惟應度者乃燭厥理非庸庸所知也弱冠詣荆南玉泉寺事恒景律師便剃髮受具歎曰夫出家者為無為法天上人間無有勝者經之所謂出四衢道露地而坐也時坦禪師乃勸讓往嵩丘觀安公安啓發之因入曹侯溪觀能公能公

怡然無馨無臭洪波泛臻大壑之廣乎韶讓合奏大樂之和乎讓之深入寂定住無動道場為若此也能公大事緣畢讓乃躋衡嶽止于觀音臺時有僧玄至拘刑獄舉念願讓師救護讓早知而勉之其僧脫難云是救苦觀音得斯號也亦由此焉化緣斯盡傳法弟子

曰道峻曰道一皆外堂觀奧也其後一公振法鼓于洪州其門弟子曰惟寬懷暉道一大緣將訖謂寬等曰吾師之道存乎妙者也無待而常不住而至能事集矣金口所生從法而化於我為子及汝為孫一燈所傳何有盡者讓以儀鳳二年生至天寶三載八月十日

是

四

終于衡嶽春秋六十八僧臘四十八一公建塔于別峯元和中寬暉至京師揚其本宗法門大啓傳百千燈京夏法寶鴻緒於斯為盛至八載衡陽太守令孤權問讓前迹權捨衣財以充忌齋自此每歲八月為觀音忌焉寶曆中勅謚大慧禪師塔號寂勝輪元和年中

常侍歸登撰碑云

唐京師大安國寺楞伽院靈著傳 法範

釋靈著姓劉氏絳州巴西人也年殆志學方遂出家登戒尋師不下千里年四十精毗尼道兼講涅槃一律一經勤於付授晚歲請問大照禪師領悟宗風守志彌篤後詣長安誕

敷禪法慕道求師者不減千計若魚龍之會淵澤也以天寶五載四月十日申時示滅于安國寺石楞伽經院享壽五十六僧夏三十六將終寺中亟多變怪蓋法門果棟之頽撓也著加跌而坐怡然而化三七日後茶毗起塔于龍首崗鄰佛陀波利藏舍利之所帝女

媯之墳右以其年十月十日遷入塔馬弟子朗智道珣如一追慕師德香火不絕內侍上柱國天水趙思侃命釋子善運撰碑于塔所焉有錢塘靈智寺釋法旣俗姓馮本長樂人也隨祖宦于江東遂為錢塘人也父子通字元達世襲冠裳傳其素業然精數百氏之餘

執志慕淨名之應質談論多召禪林之士於家別室供禮願生今嗣彌久旣誕于家岐嶷之性天發端謹纒勝衣也啓父求出俗固不阻留披剃登具探蹟三乘如指掌焉而性終耿介於此寺之深塢實浙江之陽也別構蘭若去伽藍莫遠終日安禪時同志者造門請

益翫隨事指南多有所證以天寶二載十二月十三日天之將曉告侍者端坐奮從泥曰春秋六十五僧臘減二十年于時山鳥哀鳴雲霧蒙慘遠近檀越悲泣者如堵以其月十九日遷殯于寺側山原有弟子俞法界及子懷福猶子希秀等舊所歸心結塔營事皆出其家塔因會昌中所毀今存趾焉碑石漫沒吁哉

唐潤州幽棲寺玄素傳

釋玄素字道清俗緣馬氏潤州延陵人也生有異度幼而深仁乳育安靜髫鬣希尚求歸釋門父母從之出依淨域以如意年中始奉制度諱名于江寧長壽寺進具已後戒光騰燭定水澄漣思入玄微行逾人表旣解色空常慕宗匠晚年乃南入青山幽棲寺因事威禪師躬歷彌載撞鐘大鳴威誨以勝法得其不刊之旨從是伏形苦節交養恬和敗納觀身寒暑不易貴賤怨親曾無喜愠時目之為

嬰兒行菩薩道業既高入希瞻札開元年中僧注密請至京口郡牧韋鏡屈居鶴林四部歸誠充塞寺宇素納衣空牀未嘗出戶王侯稽首不為動搖顧世名利猶如幻焉忽於一日有屠者來札謁自生感悟懺悔先罪來請素明中應供乃欣然受之降詣其舍士庶驚

駭咸稱異哉素曰佛性是同無生豈別但可度者吾其度之何異之有天寶之初吳越瞻仰如想下生楊州僧希玄請至江北竊而宵遁黑月難濟江波森然持舟擬風俄頃有白光一道引棹直渡通波獲全楚人相慶佛日再耀傾州奔赴會於津所人物拒道間無立

位解衣投施積若山丘略不干其懷抱令悉充悲田之費禮部尚書李愷為揚州牧齋心虔虔二時瞻近未幾而京口道俗思渴法音仍移牒渡江再請還郡二處紛諍莫衷所從李時謂人曰本期奉道反成愛憎因任從所請却歸南郡其感物慕德罕有與倫以天寶

十一載十一月十一日中夜無疾而化春秋八十有五哀感人倫慟徹城市以其月二十一日奉全身建塔于黃鶴山西所住之地方伯邑宰盡執喪師之禮率眾申哀江湖震響素往於寺內坐禪之所高松偃覆如蓋及移他樹還互如前又當捨壽之夕房前雙桐無

故自枯識者以為雙林之變但真乘妙理絕相難思嘉瑞靈祥應感必有經云隨緣赴感即其事也有門弟子法鑑及吳中法欽此二大士重光道原僉具別傳受菩薩戒弟子吏部侍郎齊澣廣州都督梁佛潤州刺史徐嶠京兆韋昭理給事中韓賞御史中丞李舟禮

部崔令欽並道流入望成欽師資亦嘗問道於徑山猶樂正子春於夫子洗心瞻仰天漢彌高水鑑明心悟深者衆矣泊大和中遠慕遺風高其令德追謚大律禪師大和大寶抗之塔後人多以俗氏召之曰馬祖或以姓名兼稱曰馬素是也

系曰彌天以出家子咸姓釋氏懸合後到阿
合經可不務乎素師以俗姓呼之必有由矣
噫繁盛法嗣猶不能過此訛稱則知素師名
異一飛四海仰止故登俗域今誓將來宜正
名也

唐均州武當山慧忠傳

釋慧忠俗姓舟氏越州諸暨人也執耕甲子
或謂期頤之年肌膚冰雪神宇峻爽少而好
學法受雙峯默然全真心承一印行無住相
歷試名山五嶺羅浮四明天目白崖倚帝紫
閣摩穹或松下安居於九旬或歇空息慮於
三昧既懸明月之戒亦淨琉璃之心已度禪
定之門不起無生之見巖若蘇盧八風莫能
動清如淨鑑萬象何所隱可止也我則武當
千峯狎於麋鹿可行也我則虎溪一徑分衛
人間薄遊吳楚以至于順陽川馬卜居黨子
之林泉四十餘祀深入法王之聖定八萬廣
門道聲洋乎力量充矣開元年中刺史前中

書侍郎開國公王瑒司馬太常少卿趙頤貞
信潭以清聞風而悅稅駕扣寂杳然虛空礼
足散金銀之華不異彌伽長者執手見微塵
之佛等毗目仙人上奏玄宗徵居香刹則龍
興寺也由是罷相節使王公大人罔不膜拜
願風從而問道忠博達詰訶廣窮經律降魔
制外執之與京不可以威畏不可以利動曠
日而食對月澄心清風飛霜勁節凌竹辭煥
理詣折彼慢幢論頓也不留朕迹語漸也返
常合道得之於心伊蘭作栴檀之樹失之於
指甘露乃蒺藜之園妙不可傳花多果少世
有執磔水中若獲琉璃之寶掬泡瓶內謂得

摩尼之珠忠所以訶之止之不能已矣故有
超毗盧之說令其不著佛求越法身之談俾
夫無染正性豈毗盧之可越而法身之可超
哉是以虛空之心合虛空之理纖妄若雲翳
宗通如日月朝郎結駟而至安禪不動受其
頂謁儼如也蓋所謂昔人不迎七步以福於

旦九

八

萬乘之君豈止百察而已哉肅宗皇帝載定
區夏聞其德高以上元二年正月十六日勅
內給事孫朝進駙驎迎請其手詔曰皇帝信
問朕聞調御上乘以安中土利他大士共濟
羣生師以法鑑高懸一音演說藏開祕密境
入圓明大悲不恡於津梁至善必明於兼濟

尊雄竹嘯實在朕躬思與道安宜揚妙用廣
滋福潤以及大千傳罔象之玄珠拔沈迷之
毒箭良緣斯在勿以為勞仗錫而來京師非
遠齋心已久副朕虛懷春寒師得平安好遣
書指不多及忠常以道無不在華野莫殊遂
高步入宮引登正殿霜杖初下日照龍衣天

香以焚風飄羽蓋時忠驥首接武神儀肅若
天子欽之持以師禮奏理人治國之要暢唐
堯虞舜之風帝聞竦然膝之前席九龍灑蓮
華之水萬乘飲醍醐之味從是肩昇上殿坐
而論道不拘彝典也尋令驛騎朱光輝宣旨
住千福寺相國崔渙從而問津理契於心談

之朝野識真之士往往造焉泊夫寶應臨御
以孝理國匪移前睦劃開萬里之天若見三
江之月又勅內侍袁守宏迎近闕下光宅寺
安置香飯雲來紫衣天降雖使臣擁禪門而
不進御府列玉帛而盈庭了之如泡觀之若
夢澹然閑任自樂天倪亦可羅浮不歸方名

且九

九

宴坐雙峯長往始契無生者哉成聖元胎於
是乎在固所以萬行齊發千門不累於心矣
則堯率之鼓無形乃葢脩羅之琴不撫而韻
香傳天主花兩空王見之於忠矣常以思大
師有言若欲得道衡嶽武當因奏武當山請
置太一延昌寺白崖山黨子谷置香嚴長壽
寺各請藏經一本度僧護持二聖御影鎮彼
武當王言惟允有司承式猴江厲塔雖未飾
於中峯茅棟柴扉便以名於梵宇睿札題額
驚迴鶴飛山川光燿黑白拈躍想金殿之可
期觀瑤臺之非遠至大曆八年又奏度天下
名山僧中取明經律禪法者添滿三十七人道

門因之羽服緇裳罔不虔懌數盈萬計用福九重也忠往在南陽陷於賊境固請迴避皆不允之臨白刃而辭色無撓據青雲而坐不屈魁帥觀具禪德淡若風韻高逸按劍羅拜請師事焉于時避寇遇寇者衆矣無何群盜又至乃曰未可以踵前也遂杖錫發趾沿

江而去有數其先蹤堅住不避者盡被誅戮則知雲物氣象有如先覺存而不論道何深也金籍曰般若無知而無不知斯之謂歟內德既充外應彌廣自藏珍寶人莫之窺於戲論龍奮迅而趨多不知初利雨花而明徹莫識前賢朕世正眼隨滅不亦悲夫忽疾將亟國豎罔効自而去辰衆問後事乃曰佛有明教依而行之則無累矣吾何言哉粵十年十二月九日子時右脇纍足泊然長往所司聞奏皇情憫焉中使臨弔賻贈甚厚勅謚號曰大證禪師有詔歸葬于黨子之香巖寺備其本也威儀手力所在支給具飾終之禮哀勵

梵場也勅常修功德使檢校殿中監興唐寺沙門大濟早接道論豁如披雲雖非門人哀逾法嗣凡有敷奏聖皆允焉在家弟子開府孫知古并弟內常侍朝進居士景超昆季等僧弟子千福寺志誠光宅寺智德香巖寺主道密等凡數萬人痛石室之末善悲雲峯之

且九

十

聳塔晨鐘徒擊於高殿夕梵空奏於前山哲人云亡疇將倣仰譯經沙門飛錫爲碑紀德焉

唐太原甘泉寺志賢傳

釋志賢姓江建陽人也夙心剛整幼且成規既遂出家尋加戒品需嘗漸教守護諸根抗節修心不違律範大寶元年於本州佛跡巖承事道一禪師曾無間然汲水拾薪惟務勤苦遊方見金華山赤松洞是黃初平叱石羊之地鬱林峻嶺泉湖百步許意樂幽奇既棲巔頂野老負香杭蔬茹以供之時天大旱賢望空擊石曼罵諸龍曰若業龍無能爲也其

菩薩龍王胡不違佛勅救百姓乎敲石繞畢
霈然而作發人咸悅後遊長安名公碩德列
請爲大寺功德之師賢悚然不顧明日遂行
登五臺尋止太原甘泉寺道俗請學禪理者
繼至無疾而終勅謚大遠禪師旌乎厥德矣
唐黃龍山惟忠傳

釋惟忠姓童氏成都府人也幼從業於大光
山道願禪師神驥伏櫪雖止也發蹄則超忽
千里焉遊嵩嶽見神會禪師折疑沈默處于
大方觀覽聖跡見黃龍山鬱翠而奇異乃營
茅舍其窮溪極谷而多毒龍噴氣濛濛山民
犯者多如中瘴焉醫工寡効忠初不知獨居

是九

十一

禪寂澗飲水食其怪物皆卷而懷矣山民無
害或聞空中聲云得師居此民之多幸今我
解脫也鄉人因號是山爲伏龍言忠弭伏鱗
蟲之長故此名焉以建中三年入滅報齡七
十八其年九月遷塔云
唐南嶽石頭山希遷傳

釋希遷姓陳氏端州高要人也母方懷孕不
喜葷血及生岐嶷雖在孩提不煩保母既冠
然諾自許未嘗以氣色忤人其鄉洞獠民畏
鬼神多淫祀率以牛酒祚作聖望遷輒往毀
叢祠奪牛而歸歲盈數千鄉老不能禁其理
焉聞大鑿禪師南來學心相踵遷乃直往大

鑿衍然持其手且戲之曰苟爲我弟子當肖
遷道爾而笑曰諾旣而靈機一發廓若初霽
自是上下羅浮往來三峽開開元十六年羅
浮受具戒是年歸就山夢與大鑿同乘一龜
泳於深池覺而占曰龜是靈智也池是性海
也吾與師乘靈智遊性海久矣又何夢邪後

聞廬陵清涼山思禪師爲曹溪補處又攝衣
從之當時思公之門學者麇至及遷之來乃
曰角雖多一麟足矣天寶初始造衡山南寺
寺之東有石狀如臺乃結庵其上杼載絕岳
衆仰之號曰石頭和尚焉初嶽中有固瓊讓
三禪師皆曹溪門下僉謂其徒曰彼石頭真

師子乳必能使汝眼清涼由是門人歸慕馬
 或問解脫曰誰能縛汝問淨土曰誰能垢汝
 其荅對簡速皆此類也廣德二年門人請下
 于梁端自江西主大寂湖南主石頭往來憧
 憧不見二大士為無知矣貞元六年庚午歲
 十二月二十五日順化春秋九十一僧臘六

十三門人慧朗振朗波利道悟道銑智舟相
 與建塔于東嶺塔成三十載國子博士劉軻
 素明玄理欽尚祖風與道銑相遇盛述先師
 之道軻追仰前烈為碑紀德長慶中也勅謚
 無際大師塔曰見相焉

唐成都府淨衆寺神會傳

且九

十三

釋神會俗姓石本西域人也祖父徙居因家
 于岐遂為鳳翔人美會至性懸解明智內發
 大璞不耀時未知之年三十方入蜀謁無相
 大師利根頓悟冥契心印無相歎曰吾道今
 在汝矣爾後德充慧廣鬱為禪宗其大略寂
 照滅境超證離念即心是佛不見有身當其

凝閉無象則土木其質及夫妙用默濟雲行
 雨施蚩蚩群氓陶然知化觀貌遷善聞言革
 非至於廓蕩昭洗

執縛上中下性隨分令入以貞元十年十一
 月十二日示疾儼然加趺坐滅春秋七十五
 法臘三十六沙門那提得師之道傳授將來
 以十二年二月二十二日門人弟子緇俗遷
 座于本院之北隅焉慕師德號哭之聲山林
 為之變色初會傳法在坤維四遠禪徒臻萃
 于寺時南康王韋公舉家歸心于會及卒哀
 咽追仰蓋粗入會之門得其禪要為立碑自
 撰文并書禪宗榮之

唐杭州徑山法欽傳

釋法欽俗姓朱氏吳郡崑山人也門地儒雅
 祖考皆達女儒而傲睨林藪不仕欽託孕母
 管氏忽夢蓮華生於庭際因折一房繫於衣
 裳既而覺已便惡葷羶及迄誕彌歲在於髻
 辨則好為佛事立性溫柔雅好高尚服勤經

且九

十三

史便從鄉舉年二十有八儻裝赴京師路由丹徒因遇鶴林素禪師默識玄鑒知有異操乃謂之曰觀子神府溫粹幾乎生知若能出家必會如來知見欽聞悟識本心素乃躬爲剃髮謂門人法鑑曰此子異日大興吾教與人爲師尋登壇納戒鍊行安禪領徑直之一

言越周旋之三學自此辭素南征素曰汝乘流而行逢徑即止後到臨安視東北之高巒乃天目之分徑隅問樵子言是徑山遂謀挂錫於此見苦蓋覆置網屑近而宴居介然而坐時雨雪方霽芳無煙火獵者至將取其物頗甚驚異嘆咤皆焚網折弓而知止殺焉下

山慕人營小室請居之近山居前臨海令吳貞捨別墅以資之自茲盛化叅學者衆代宗睿武皇帝大曆三年戊申歲二月下詔曰朕聞江左有蘊道禪人德性冰霜淨行林野朕虛心瞻企渴仰懸懸有感必通國亦大慶願和尚遠降中天盡朕歸向不違願力應物見

形今遣內侍黃鳳宣旨特到詔迎速副朕心春暄師得安否遣此不多及勅令本州供送凡到州縣開淨院安置官吏不許謁見疲師心力弟子不筭多少聽其隨侍帝見鄭重咨問法要供施勤至司徒楊綰篤情道樞行出人表一見欽於衆退而嘆曰此實方外之高

士也難得而名焉帝累賜以縑繒陳設御饌皆拒而不受止布衣蔬食悉令弟子分衛唯用陶器行少欲知足無以儔比帝聞之更加仰重謂南陽忠禪師曰欲錫欽一名手詔賜號國一焉德宗貞元五年遣使賫璽書宣勞并慶賜豐厚欽之在京及迴浙令僕公王節

制州邑名賢執弟子禮者相國崔渙裴晉公度第五琦陳少遊等自淮而南婦人礼乞號皆目之爲功德山焉六年州牧王顏請出州治龍興寺淨院安置婉避韓滉之廢毀山房也八年壬申十二月示疾說法而長逝報齡七十九法臘五十德宗賜諡曰大覺所度弟

且九

古

子崇惠禪師次大祿山顏禪師參學范陽杏山悟禪師次清陽廣敷禪師于時奉葬禮者弟子實相常覺等以全身起塔于龍興淨院初欽在山猛獸驚鳥馴狎有白兔二跪于杖履之間又嘗養一雞不食生類隨之若影不遊他所及其入長安長鳴三日而絕今雞豕

在山之極欽形貌魁岸身裁七尺骨法奇異今塔中塑師之貌凭机猶生焉杭之錢氏為國當天復壬戌中叛徒許思作亂兵士雜宜城之卒發此塔謂其中有寶貨見二甕上下合藏肉形全在而髮長覆面兵士合甕而去刺史王顏撰碑述德比部郎中崔元翰湖州刺史崔玄亮故相李吉甫丘丹各有碑碣焉唐壽春三峯山道樹傳釋道樹姓聞氏唐州人也少以辯智沉靜虛豁耽嗜經籍曾無少懈其為人也貞固足以幹事隱括足以矯時偶遇僧敦喻遂誓出塵自慨年近不惑求法淹遲礼本部明月山大

光院惠文為授業登即荆滌二年受具乃觀方向道天台南岳無所不遊後迴東洛遇秀宗裔如芙蓉開通達安靜至壽州三峯結茅而居常有野人服色朴素言談異常於言笑之外化作佛形仙形菩薩羅漢或放神光或呈聲響如是涉一十年學侶觀之不測端緒

是

十五

後皆寂爾樹告眾曰野人作多色伎倆眩惑於人只消老僧不見不聞伊伎倆有窮吾不見不聞無盡所謂作偽心勞而日拙其自知之卷著懷拙而去追無朕迹矣樹於寶曆初年示疾而終報齡九十二明年正月遷塔焉系曰大鈞播物物類紛錯窮數達變因形移易者謂之化謂之幻知幻化之不異生也始窮幻化矣吾與汝俱幻也推之於實則幻化或虛置之於虛則幻化時實實虛理齊不自我之先後歟體道無心物我均矣故佛言凡所見相唯所見心又云若見諸相非相則見如來樹師有焉

唐陝州迴鑿寺慧空傳元觀

釋慧空姓崔江陵人也家世儒雅奔業纓綬父任陝服靈寶縣空丁艱天屬堅請入空門庸報乳哺重恩乃投迴鑿寺恒超下授受經業三載誦通及格蒙度聽習敏利因入嵩少遇寂師禪會豁如開悟乃迴三峯於仙掌間

有道流綱繆論道薄暮方散非止一過州帥元公頗知歸向召之多以疾辭或至必登元席代宗皇帝開其有道下詔俾居京師廣福寺朝廷公卿罔不傾信後終于寺春秋七十八大曆八年癸丑九月四日全身堅固而遷塔焉次南嶽東臺釋元觀姓袁氏長安人也

父為河中府掾母兄為沙門甚款道化見觀幼齡聰慧風標秀舉有成人之度因勸其出家乃投興善寺誦經通利五年得度乃於律部俱舍二本渙然條理後出遊方登諸禪會明悟真性如醒宿醒遂趨衡山於東臺而止其道彌昌冥有所感恒得神人密送供施隨

其眾寡不聞有闕忽一日神現形拜曰我是此山檀越常送薄供者我身是也觀問汝何業所致曰我前身曾稱知識體悟匪全妄受信施坐此為神偶師居此我曹饋糗粗副私願今二十年已足得遂超度故來决別也觀化緣斯極厲累禪徒而終春秋七十九大

且九

十六

和四年十月二日遷塔焉

唐洛京龍興寺崇珪傳全植

釋崇珪姓姜氏郟城人也門傳儒素相繼簪裾自天寶已來安史之亂侵敗王略家族遷蕩父為商估趨利遵塗於鞏洛間父亡于逆旅珪慨責曰少遭不造子遺哀榮遂議出家

至年十八經業蔚通得度俄有雲水之興遊南嶽棲息數齡起迴樂南徐茅山乃依棲霞寺珪已登徑門道聲洋溢會贊皇李公德裕廉問是邦延諸慈和寺一交雅談如遊形器之外曰吾有幽憂之疾非是居侯藩聚落之人也明歲遂行重枉嵩少居于嶽寺大和戊

大宋高僧傳卷第十

旦九

申歲洛下亢陽唯嶽中雨信相繼或謂為珪之德動龍神之故也開成元年贊皇公攝冢宰請珪於洛龍興寺化徒兩京緇白往來問道檀施交駢其所談法宗秀之提唱獲益明心者多矣忽告衆决別入方丈而滅春秋八十六白侍郎撰塔銘會昌元年辛酉八月十日入塔云次淮南都梁山釋全植姓芮光州人也少稟異操自言學作佛度生去忽投本州榮光禪院大智下求度師頓嚴謹約其誦經受具後至洛陽參問禪法徹了無疑辭師觀方至淮南都梁山建立茅舍太守衛文卿命於州治長壽寺化徒衛侯問將來佛法隆

替若何植曰真實之物無振自古于今往復軌躅有為之法四相遷流法當陞厄君侯翹足可見預言武宗毀教也植終年九十三門人建塔立碑會昌四年甲子九月七日入浮圖焉

上末

大宋高僧傳卷第十

旦十

左街天壽寺通慧大師賜紫 贊寧

左街相國寺講經論大德賜紫 智輪

同奉

勅撰

習禪篇第三之三 正傳十六人 附見八人

唐洪州開元寺道一傳一 智威

唐宣州靈湯泉蘭若志滿傳二

唐沂州寶真院光瑤傳三 道堅

唐揚州華林寺靈坦傳四

唐唐州紫玉山道通傳五

唐雍京章敬寺懷暉傳六